

DISSERTATIO JURIDICA,
DE

GRAMMATICA MALA,

QUAM,

DEO TER OPT. MAX. ADNUENTE,
IN ILLUSTRIS ACADEMIA FRIDERICIANA,

PRAESIDE

D O M I N O

JACOBO FRIDER. LUDOVICI,

Jcto,

POTENTISS. REGIS BORUSSIAE CONSILIARIO AULICO
ET PROFESS. JUR. PUBL. ORDINAR.

Ad d. 2. Novembr. MDCCXX.

H. L. Q. C.

PLACIDO ERUDITORUM EXAMINI SUBMITTIT

AUCTOR

C. CHRISTIANUS LEYSSNER,

MAGDEBURGICUS.


HALÆ MAGDEBURGICÆ,

LITTERIS JOH. CHRIST. GRUNERTI, ACAD. TYPOGR.

Recusa MDCCXLI.

(6)





MAGNIFICIS, PRÆNOBILISSIMIS, AMPLISSIMIS, CON-
SULTISSIMIS, PRUDENTISSIMIS

D O M I N I S

REIPUBLICÆ MAGDEBURGICÆ

CONSULIBUS,
SYNDICO,

JURIUM CONSULTO FAMIGERATISSIMO,
ET RELIQUIS,

QUI AMPLISSIMUM CONSTITUUNT ORDINEM SE-
NATORIUM,

JURIS PERITISSIMIS,

Patronis meis observantissime colendis,

HAS

STUDIORUM ACADEMICORUM

PRIMITIAS

PERPETUÆ OBSERVANTIÆ GRATISSIMIQUE ANIMI
TESTES

IN

DEVOTISSIMÆ MENTIS CRITERIUM

DICAT, DEDICATQUE

C. CHRISTIANUS LEYSSNER, JUR. CULT.



Atriæ memoriam ab-
jicere, PATRES
CONSCRIPTI,
apud omnes gentes
flagitium reputatum
fuisse in aprico est: Idcirco, ne in-
gratus terram, qua primam aspexi
lucem, teram, jam dudum optavi,
ut publicum aliquod singularis meæ
pie-

pietatis ederem testimonium. Illu-
xit nunc ille dies, quo lubenti ani-
mo id jam exsequor, & quas in pu-
blicum promulgo studiorum meo-
rum exiguas primitias, has ipsas
VOBIS, PATRES PATRIÆ,
sacras esse cupio. Permittite igitur,
ut dum magna facitis, exigua, quæ
profero, **VOBIS** offeram, ac de
instituto meo candidos ac accuratos
Judices **VOS** expetam. Accipite
ergo, quod Patriæ debeo! Accipi-
te opellum meum benigno ultra mo-
dum affectu. Ceterum **BENIGNIS-
SIMUM NUMEN** supplex vene-
ror, ut **MAGNIFICORUM
CONSULTISSIMORUMQUE
CONSULUM, SYNDICI, JU-
RIS PERITISSIMI, & reliquo-
rum SENATORUM, Patrono-
rum**

rum meorum ad cineres usque de-
venerandorum, quos Parthenopo-
lis hac tempestate vidit, vestram
vitæ tam salutaris PATRIÆ quam
mihi incolumitatem ad longissimum
proroget ævum. Vigeat itaque
**ORDO SENATORUM AM-
PLISSIMUS! Floreat CONCI-
LIUM URBIS MAGDEBUR-
GICÆ FAMIGERATISSI-
MUM! Sis Autor! Sis Fulcrum!
Sis Promotor!**

VESTRI

obsequentissimi

C. CHRISTIAN. LEYSSNERI,
JUR. CULT.



DISSERTATIO JURIDICA
DE
GRAMMATICA MALA.
INGRESSUS.



Communico tecum, benevole Lector, præsentem dissertationem de Grammatica eaque mala. Dicent forsân aliqui: quid grammatica mala ad JCtos, remittenda illa est ad trivium & ad ludimoderatores, qui in pulvere versantur & perpetuo Jovis odio vexantur, ut hi vitia emendent & pro re nata graviter in peccantes animadvertant, JCti enim suis vocum adlusionibus, dicente Zieglero, grammaticorum rigori non sunt subjiciendi. Sed salva res est. Aliter judicant Grammatici, aliter JCti. Nos
A 2 re-

recensemus saltem vitia nonnulla contra regulas artis admissa & disquirimus, utrum illa noceant intuitu juris, quod quis prætendit, annon? de similibus vitiis deinde idem est iudicium eodem intuitu. In phrontisterio autem non sedemus, nec pœnam aliquam scholasticam dictamus, quam forsan ad jurisdictionem scholasticam inferiorem referre possis. Relinquimus hæc hypodidascalis. Potuissimus titulum dissertationis etiam alio modo, v. g. *de vitio latinitatis, de stilo biulco*, &c. formare; sed magis sese nobis adprobavit terminus grammaticæ malæ; quia latinitas & stilus ex regulis grammaticæ dijudicari debet & veteres Juri, Bartolus, ceteri, vitium contra regulas artis grammaticæ admissum nomine grammaticæ malæ vulgo insignire solent. Grammatica mala ergo eodem modo dicitur, ut carmen malum, quod juxta regulas artis non est compositum. Sed ad ipsam rem propero.

CONTENTA TOTIUS DISSERTATIONIS.

Grammatistica & grammatica inter se differunt. Grammatistica est ars vilis & hinc in jure nullam immunitatem a civilibus muneribus habent, qui pueros primas litteras docent, §. I. grammatistica quamvis vilis reputetur, magnum

gnum tamen usum illa habet. *Litterarum expertes miseri, etiamsi ad tutelam admittuntur, §. II. grammatica grammaticistica opposita est ars bene loquendi. Doctores grammatici. Hi immunitatem a muneribus habent & interdum comitum consequuntur, §. III. Grammatica ad artes liberales refertur. Septem sunt artes. Trivium, quadrivium, §. IV. grammatica sepe etiam grammaticisticam sub se comprehendit. §. V. Quenam grammatica bona, quenam mala? §. VI. regule artis grammaticæ ex hominum instituto & iacita conventionione populi alicujus originem suam trahunt, §. VII. modus loquendi non dependet a potestate principis absoluta. Exemplum de Cæsare Sigismundo, qui in concilio Constantiensi in regulas artis impingebat, §. IIX. privati non possunt invenire nova vocabula, aut novas regulas construendi, ad eum effectum, ut reliqui inviti ea inventa recipere cogantur. De barbarismis & solæcismis, quales etiam in nonnullis legibus reperiantur. Exempla huc pertinentia, §. IX. an semine grammaticam discere queant & an tutor eas impensas repetere, vel deducere possit, quas præstitit, ut pupilla artibus liberalibus imbueretur, §. X. Leges obligant, licet contra regulas artis impingant, §. XI. de rescriptis superiorum, in quibus grammaticæ regulæ non adcurate fuerunt observatæ, §. XII. regula juris canonici, falsam latinitatem vitare rescriptum Pape. Extensio hujus regulæ ad eum casum quoque, si rescriptum illud non per cancellariam, sed per cameram, ut loquuntur, emanaverit, §. XIII. Tres limitationes Panormitani. Prima, falsam latinitatem non vitare rescriptum pape, si stilus aliquo modo defendi potest, aut si ille non satis elegans solum sit; §. XIV. Secunda, si falsa latinitas potest salvari per figuram, §. XV. tertia limitatio, non vi-*

tiari rescriptum papæ propter modicum defectum litteræ, vel
 tituli, §. XVI. pontificum scripta solacismis & barbarismis
 scatent, quam tamen adsertionem ægre fert Gonzalez Tellez,
 §. XVII. suspicio falsi etiam oritur, si vitium grammaticale
 enorme in rescriptis principum reperitur, vel in sententiis,
 secus in vitio leviori, §. XIX. iudex suspectum rescriptum
 non statim exequi tenetur, sed secundam iurisdictionem expectare
 potest, optimum tamen est, ut rem ad principem iterum refe-
 rat, §. XIX. barbaries sequiorum temporum, præcipue in-
 tuitu clericorum, qui cum barbarismis & solacismis Deum in-
 vocabant, §. XX. plura huc pertinentia, §. XXI. origo dis-
 criminis, quod aliqui orationem dominicam in lingua germa-
 nica exordiantur: **Vater Unser**, alii: **Unser Vater**. Bar-
 baries & ignorantia in Germania, §. XXII. adhortatio Au-
 gustini, ne catechumeni clericos barbaros videant. Alia ad-
 hortatio ad clericos directa, §. XXIII. exempla episcoporum
 propter ignorantiam ab officio remotorum, §. XXIV. addu-
 cuntur adhuc duo alia lepida exempla de fratribus ignorantia,
 §. XXV. Rationes dubitandi respectu adsertionis, quod cleri-
 ci illitterati ab officio sint removendi, §. XXVI. ratio deci-
 dendi, §. XXVII. responsio ad rationes dubitandi, §. XXIX.
 apud evangelicos quoque ministri ecclesiæ linguis aliisque ar-
 tibus instructi esse debent, sine quibus officio suo præesse neque-
 unt. Ignari ergo removendi, §. XXIX. de clerico, qui in-
 fantem baptizabat in nomine patris & filii & spiritus sancti.
 Baptismus validus declaratus fuit, §. XXX. Ratio pro vali-
 ditate baptismi. Consensus evangelicorum, §. XXXI. qua-
 re frater ille ignorantia non fuerit a Papa ab officio remotus?
 §. XXXII. propter malam grammaticam non vitatur instru-
 mentum, nec privatium, nec a notario confectum, §. XXXIII.

diver-

diversi casus ab invicem distinguuntur, §. XXXIV. si duo contraria instrumenta super eodem negotio inveniuntur, quorum alterum juxta artis regulas conscriptum, alterum vero barbarismis & solæcismis scatet, illud huic præfertur ceteris paribus, §. XXXV. testamenta non vitiantur propter malam grammaticam, si de mente testatoris constat. Casus huc pertinentes, §. XXXVI. XXXVII. idem in hac materia est, si ipse testator, sive alius ejus mandato testamentum conscripserit, §. XXXVIII. alius casus hanc materiam illustrans, §. XXXIX. si tamen dubium occurrit, de qua re testator locutus sit, in materia de interpretatione ille significatus præferri debet, qui cum regulis artis grammaticæ congruit, §. XL. dispositio vitiat, si testator vocabula mutat, ipsisque novum significatum imponit, quod tamen de nominibus appellativis solum, non vero de propriis intelligendum, §. XLI. dispositio vitiat, si scriptura plane legi, aut propter plurimos barbarismos sensus ex verbis loquentis erui nequit, §. XLII.

§. I.



Erardus Johannes Vossius in *tract. de quatuor artibus popularibus* (scilicet grammatica, gymnastica, musica ac graphica, siue pictoria,) *cap. 2. nec non de philologia c. 4. inter grammatiscen & grammaticen* differentiam notabilem intercedere adserit. Scilicet *grammatiscæ* ipsi est nuda legendi scribendique scientia. Nuncupant alias eam *litteras elementarias*, siue *prima elementa*, de quibus Horatius *epist. ad Pisones*:

- - - ut pueris olim dant crustula blandi

Doctores, elementa velint ut discere prima.

Ars hæc vilis existimatur vulgo, quam causam esse credo, quod in *l. 2. §. 8. de vacat. & excus. mun.* habetur: eos, qui pueros primas litteras docent, immunitatem a civilibus muneribus non habere; sed ne cui eorum id, quod supra vires sit, imponatur, ad Præsidis religionem pertinere, sive in civitatibus, sive in vicis primas litteras magistri doceant. add. *l. 11. §. 4. ff. de muner.*

§. II.

Quamvis vero grammaticæ, uti dictum, vilis reputetur; recte tamen idem Vossius ejus usum tantum esse dicit, ut vix ullis laudibus satis prædicari possit. Præcipua enim ejus utilitas in hoc consistit, quod sic occurratur hominum oblivioni, cum nemo omnium, quæ videt, vel audit, semper valeat meminisse. Nec negotia, vel commercia absque ea possunt consistere. Maximus quoque usus est in fœderibus & pactis, ad homines in officio continendos. Magnum præterea est, quod scriptura etiam absentibus mentem nostram aperimus. Prodimus posteris, quæ multo ante ætatem eorum contigerunt, ne puerorum similes, sui solum temporis res sciant, ac divinam nesciant providentiam in hoc mundo gubernando. Omnis quoque disciplinarum ordo, ac philosophia universa, quatenus naturæ lumine cognita est, ad venturæ seculæ propagatur. Pluribus hæc persequitur Vossius *d. cap. 2.* Unde miseri litterarum expertes. Equidem in *l. 6. §. 19. ff. de excus. tut.* dicitur, excusationem illius intuitu tutelæ accipi non debere, *qui se neget litteras scire, si modo non sit expertis negotio-*

gotiorum; sed nihil muto. Debet litterarum expers tutelam fuscipere, ergo fuscipit onus. Rationes per alium conficere debet, quia ipse litterarum expers, quod valde periculofum, & ergo mifer eft.

§. III.

Grammatices nomine intelligitur non vulgaris illa grammatiftice, de qua dictum, fed doctior, quæ eft *bene loquendi ars*, maximorumque virorum ftudio elaborata & perfecta. Videtur adlatam differentiam quoque innuere Lactantius *de falſa ſapientia* l. 3. oper. c. 24. *Multis*, inquit, *artibus opus eſt, ut ad philoſophiam poſſit accedi. Diſcende iſtæ communes litteræ propter uſum legendi, quia in tanta rerum varietate nec diſci audiendo poſſunt omnia; nec memoria contineri.* Hæc ad grammatifticen pertinent. Jam pergit: *Grammaticis quoque non parum operæ dandum eſt, ut rectam loquendi rationem ſcias. Id multos annos auferat necèſſe eſt.* Hinc doctores grammatici originem duxerunt, v. Conring. *de antiquit. academ. ſupplem.* 32. p. m. 300. verb. uti (Servatus Lupus) ab eo (Rabano Mauro) *ingreſſum caperet divinarum ſcientiarum, jam ſum doctorem grammaticum ſortitus, a quo artis præcepta acceperat.* Conferri hic etiam poterit Iſidorus *origin. l. 1. c. 5.* De ejusmodi Grammaticis intelligenda eſt l. 6. C. *de Profeſſ. & med.* quod illi una cum uxoribus & filiis, nec non & rebus, quas in civitatibus ſuis poſſident, ab omni functione & ab omnibus muneribus vel civilibus, vel publicis immunes eſſe debeant. Majora adhuc habentur in l. 1. C. *de profeſſ. qui in urb. Conſtantiноп.* de comitativa grammaticorum, qui per viginti annos docuerunt. Erat autem *comitativa* honor vicinus illuſtribus

spectabilesque antecedeat, Calvin. *lex. jurid. voc. comitiva*.

§. IV.

Grammatica ergo ad artes liberales refertur. Septem harum artium quondam enumerabantur, ubi nulla theologiæ, nulla artis medicæ, multo minus ulla aut romani, aut pontificii juris erat professio in academiis, & ubi illa ipsa artium liberalium disciplina arctis litteraturæ rudioris limitibus circumsepta reperiebatur. *Trivium*, unde scholæ triviales, complectebatur grammaticam, rethoricam & dialecticam: *quadrivium* autem arithmeticæ, geometriæ, musicæ & astronomiæ rudimenta, v. Conring. *de antiquitat. academ. diff. 3. p. m. 80.* & de trivialibus scholis in monasteriis *supplem. 32. p. 299.* adde Isidorum *in orig. l. 1. c. 2.* & M. Aurel. Cassiodorum, qui *in operib.* de singulis egit. Noti sunt versiculi de trivio:

Gramm. loquitur, dia. vera docet, rhe. verba colorat:
& de quadrivio:

Mus. canit, ar. numerat, geo. ponderat, ast. colit astra.

§. V.

Vidimus differentiam inter grammaticam & grammaticam. Ipse interim supra citatus Vossius *de philologia c. 4. §. 4.* non diffitetur, quod vocabulum grammaticæ sæpe etiam grammaticam sub se comprehendat, in quem finem sequentia ex Sexto Empirico adducit: *grammatice dicitur equivoce communiter, et proprie ac communiter quidem cognitio quarumcunque litterarum, sive græcarum, sive barbararum, quam grammaticiscen solemus adpellare. Proprie autem, quæ est perfecta atque abso-*

absoluta labore ac studio Cratetis Mallotæ, Aristophanis & Aristarchi.

§. VI

Grammatistice ad nos principaliter non spectat, sed potius ipsa *grammatica*, ars illa bene loquendi & scribendi. Ergo, si regulæ artis in loquendo & scribendo adcurate observantur, vocatur nobis *grammatica bona*; sin autem in dictas regulas impingitur, *mala* audit. Eodem modo grammaticus bonus est, qui juxta regulas artis loquitur & scribit: malus ex diverso, qui illas regulas ignorat, & sibi quælibet hoc, vel alio modo preferre licere existimat. Interim intuitu grammaticæ bonæ non requirimus, ut quis omnes apices observet nimiamque & miseram diligentiam circa quælibet vocabula adhibeat; sed hoc nobis pro præsentis instituti ratione sufficit, si modo vulgares & consuetæ regulæ observentur. Summum rigorem relinquimus illis grammaticis, qui, dicente Zieglero *de jur. majest. l. 1. c. 1. §. 1.* in phrontisteriis suis (nisi pistrina potius ac carnificinas dicere mauis,) vultuosam quandam majestatem, in majori scilicet statu collocati, non simulant tantum, sed gerunt, &c.

§. VII.

Sicut vocabula ipsa ex mero hominum arbitrio atque instituto dependent, vis enim, determinate hoc, vel illud signifiandi, non inest a natura, aut intrinseca quadam necessitate: ita quoque ars ipsa & regulæ artis grammaticæ ex eodem instituto & tacita conventionione populi alicujus originem trahunt, v. Pufendorff. *de I. N. & G. l. 4. c. 1. §. 1.* *Consuetudo*, inquit Quintilianus *instit.*

orator. l. i. c. 6. est certissima loquendi magistra: utendum-que plane sermone, ut nummo, cui publica forma est. Quemadmodum vero valor nummi in rebus publicis sæpe mutatur: ita quoque loquendi ratio, unde non ad vetera, sed præsentia tempora respiciendum, si vetera vocabula plane obliterata. Ita v. g. rideremus eum, qui hodie eo modo loqui vellet, prout in LL. XII. tabularum habetur. Bene Quintilianus loc. cit. nam si potest videri, nihil peccare, qui utitur bis verbis, quæ summi autores tradiderunt, multum tamen refert, non solum quid dixerint, sed etiam quid persuaferint. Neque enim tuburcinabundum & Iurcabundum jam in nobis quisquam ferat, licet Cato sit autor: nec hos Lodicæ, quamquam id Pollioni placet: nec gladiola, atqui Messala dixit: nec parricidatum, quod in Calio vix tolerabile videtur: nec collos mihi Caluus persuaferit: quæ nec ipsi jam dicerent. Superest igitur consuetudo: nam fuerit pene ridiculum, malle sermonem, quo locuti sunt homines, quam quo loquantur. Confer, si placet Erasmi synodum grammaticorum, ubi etiam in notis Arnoldi Montani lepida inveniuntur de vocibus Tata & Mamma, quibus infantes parentes nuncupant. Sicut etiam elegans jocus reperitur apud Martialem l. i. epigramm. 100. de vetula Afra:

*Mamas atque Tatas habet Afra: sed ipsa Tatarum
Dici & Mammarum maxima Mamma potest.*

§. IIX.

Fluit exinde, modum loquendi adcurate dicendo non dependere a potestate principis absoluta, sed principem quoque ad regulas artis grammaticæ sese conformare debere. Aliter sentiebat Sigismundus imperator, qui

qui lubrico linguæ contra regulas grammaticæ impingebat. Historiam diversimode referunt diverſi ſcriptores. Martinus Cruſius *in annal. Suev. p. 3. l. 6. c. 10. ab init.* ita: Anno 1414. quia tres Papæ adulterini erant, Iohannes XXIII. Gregorius XII. & Benedictus XIII. atque Huſſitica doctrina auctoritati pontificiæ plurimum detrahebat: concilium Conſtantiæ cœptum eſt celebrari. Ad quod cum cæſar Sigismundus veniſſet, dixit ad patres: *date operam, ut illa nefandiſſima ſchiſma eradiceſtur.* Tum reſpondit quidam: *Sereniſſime Cæſar, ſchiſma eſt generis neutrius.* Quis hoc dicit? quærit cæſar. Reſpondet alter: Alexander Gallus. Cæſar ruſus: & quis iſte Alexander? reſponſum eſt: monachus. Retulit Sigismundus: *& nos rex Romanorum ideoque maioris auctoritatis.* Nonne iſtituere poſſumus novam Grammaticam. Iohannes Cuſpinianus *de cæſar. atque imperat. Roman. ſub Sigismundo cæſare* paullo aliter: Fuit autem, inquit, Sigismundus princeps humaniſſimus, proceræ ac inſignis ſtaturæ, pulchra facie, crinibus criſpis, barba prolixa, quam in favorem Hungarorum, quibus olim a longis barbibus Longobardorum nomen erat, (quod nos Cuſpiniano relinquimus,) nutritiv: liberalis ac munificus. Cui incredibile pietatis ac religionis augendæ ſtudio fuit. Facetiſſimus & ingenioſiſſimus Princeps. De cujus vita ac facetiis liber hiftoriarum inſignis & grandis adhuc extat in Alſatia apud D. de Plumeneck, innumeras continens & jucundiſſimas hiftorias ac facetias, quas egit Sigismundus in juventute cum Argentinenſibus mulieribus, quæ ejus ſemper gaudebant ſocietate, aliſque illuſtribus ſcæminis, quibus-

cum familiariter & honeste semper convixit. Passim autem id de eo scribitur, cum in concilio Constantiensi lapsu forte linguæ, alioqui disertus ac facundus, multarumque linguarum peritus, *a grammaticæ regulis deerasset, schismæque feminino, non neutro genere* (ut grammatici docent) *protulisset*, esse tum a Placentino correptum Cardinale. Cui mox ex tempore dixit: *Placentine, Placentine, si omnibus placeres, minime nobis places, qui minoris nos autoritatis, quam Priscianum Grammaticum, quem offendisse me adseris, existimas.* Maximo omnium, qui aderant, cachinno suscepta est Cæsaris speccati commissi excusatio. Multarum enim linguarum scientia, (ut scripsimus) claruit, & linguam latinam observavit. Ob id doctos homines inprimis fouit, & amplis dignitatibus honestavit: sæpius accusans Germanos principes, qui litteras odissent latinas, add. Lehmannus in *chron. Spirens. l. 7. cap. 79.*

§. IX.

Ex eodem fonte fluit, privatos non posse inuenire nova vocabula, aut novas regulas construendi, ad eum effectum, ut reliqui inviti ea inventa recipere cogantur. Vocantur ejusmodi vocabula *barbara* & vitium, quod fit in singulis verbis, *barbarismus*; si vero vitium in contextu, vel complexu orationis est, *solæcismus* dicitur Quintiliano *l. 1. orator. c. 5.* Multos barbarismos conlegit B. Cellarius in *antibarbaro* suo & in curis posterioribus *de barbarismis & idiotismis sermonis latini*, qui sub barbarismo etiam solæcismum comprehendit. Apud glossatores similesve scriptores barbarismi passim inveniuntur, quo refero *imbrevisaturam, matricem, bastar-*

bastardellum, filziam, pro protocollo notarii, v. Bornit. *de fid. instrum. l. 2. c. 24. barattariam* pro crimine repetundarum, Brunnem. *ad l. 1. ff. de L. Jul. repetund. mobatram*, quando quis indigenti certas merces cariori pretio credit, quas ille mox vilius vendere tenetur, quo pecuniam consequatur, Stryk. *caut. contract. sect. 2. c. 1. §. 31. scartafacciam* pro scriptura, quæ conficitur a mercatore sine ordine memoriæ causâ, Rösener *de libr. mercat. c. 11. num. 234. 235.* De decreto contra barbarismorum ridiculam gentem promulgato lepida adfert Andreas Salernitanus *in bello grammaticali in f.* ubi inter alia dicit, eam gentem omnibus grammaticæ finibus submotam fuisse & barbarismos quidem ad se profectos cisalpinas gentes civitatibus suis donasse, ignorantia vero deditos quorundam principum favore protectos, non Italiam modo, sed urbem etiam ipsam bonarum litterarum parentem & vel invitam tueri perseverare, &c. in jure Longobardico quoque vocabula barbara frequentia sunt, ut *guerra, assalire, cucurbitare*, &c. conferendus omnino Carolus du Fresne *in glossario ad scriptores mediæ & infimæ latinitatis*, nec non *epistolæ obscurorum virorum*. Certe apud Polonos grammatica mala etiam non infrequens est, uti vel ex versione latina juris feudalis Saxonici adparet, v. g. c. 2. *feudum in pueros non heredit*, c. 12. §. 5. *feudum in possessione tenere*, &c. addatur *jus terrestre nobilitatis Prusie* a Daniele Paterfonio editum. Quid dicam de *legendis sanctorum sanctarumve per Jacobum de Voragine congestis?*

§. X.

Studium grammaticæ ad omnes pertinet. Interim

rim Stephanus Daoyz. in indice & summa omnium, que continentur tam in textu, quam in glossa voc. grammatica, dubium mouet: an feminae grammaticam addiscere possint? rationem dubitandi ab eo desumit, quia foeminae non possunt postulare, & quia vulgo dicitur, infantem nutritum vino & mulierem discentem latine loqui vix peruenire ad bonum finem; interim pro adfirmatiua decidit & decisionem probat tam ex ipsa l. 4. ff. ubi pup. educ. quam ex glossa ad eand. l. Refert Julianus hunc casum: Instituerat aliquis heredem filium suum, filiae autem dotis nomine, cum in familia nupsisset, ducenta legauerat, nec quidquam praeterea, filio autem & filiae Sempronium tutorem dederat. Tutor Sempronius a cognatis & propinquis pupillae ad magistratum perductus iussus erat, alimenta pupillae & mercedes, ut liberalibus artibus institueretur, pupillae nomine praceptoribus dare: pupillus pubes factus puberi jam factae sorori suae ducenta legati causa soluebat & jam tutelae iudicio a tutore ea consequi volebat, quae tutor in alimenta pupillae & mercedes praestiterat; respondet Julianus, tutorem nihil nomine tutelae iudicio pupillo, aut substitutis pupilli praestare debere, etsi ille citra magistratum decretum sororem pupilli sui aluerit & liberalibus artibus instituerit. Addit glossator: sic forte olim moris, mulieres legere grammaticam: & paulo post: quod mulieres discere possint grammaticam, defenditur hac lege. Sed haec obiter, & grammatica hic pro philologia accipitur, de quo significatu v. Vossium de philolog c. 4. §. 4. Haec grammatica bona est.

§. XI.

Sed quid de mala grammatica in sensu juris, si quis contra regulas artis peccat? primo de *legislatoribus & legibus* videamus. Si in legibus præcepta artis observantur, eo facilius intelligi possunt, quod ad virtutes legum refertur, perspicuæ enim esse debent. Impp. Valentinianus & Martianus in *l. 9. C. de LL. leges sacratissimæ, quæ constringunt hominum vitas, intelligi ab omnibus debent, ut universi præscripto earum manifestius cognito, vel inhibita declinent, vel permissa sectentur*, add. Cornel. Benincasius de *constitut. quest. 2. n. 27.* interim licet leges in regulas artis impingant, prout exempla in §. IX. vidimus, nihilominus tamen vim obligandi habent, cum subditorum non sit, de qualitate legum disputare, sed actiones suas legum præcepto conformare.

§. XII.

Intuitu *rescriptorum* specialia in jure canonico inveniuntur. Textus principalis huc pertinens habetur in *c. ii. X. de rescript.* quem integrum, prout Gonzalez Tellez eum exhibet, ab initio adponemus. Verba Lucii III. hæc sunt: Ad audientiam nostram te significante pervenit, quod H. de S. Stephano super absolutione sua litteras tibi (ut prima facie videbatur) apostolicas præsentavit, quas quoniam habuisti suspectas, nec de cancellaria ecclesiæ Romanæ emanasse putasti, ad nos remittere curavisti, consulens apostolatum nostrum, (unde devotionem tuam in Domino commendamus,) utrum occasione ipsarum litterarum præfatum virum habere debeas absolutum. Nos igitur litteris ipsis diligenter inspectis taliter tibi duximus respondendum,

C

quod

quod cum eas non credamus de prædecessoris nostri conscientia emanasse, nullam eis fidem te volumus adhibere, *cum etiam manifestum contineant in constructione peccatum.*

§. XIII.

Controversia ergo, ut vides, hæc est: *quid intuitu rescriptorum pontificalium ex neglectu præceptorum artis grammaticæ præsumendum sit?* pontifex in textu adducto ejusmodi rescripta pro falsis habenda esse declarat in verbis: *nullam eis fidem te volumus adhibere*, hac unica ratione subjuncta, *cum manifestum contineant in constructione peccatum.* Hic Panormitanus *ad d. c. ii.* hanc regulam ponit: *falsa latinitas vitiat rescriptum papæ*, casum vero, ad quem adductus textus respicit, hoc stilo, fere barbaro, proponit: quidam erat excommunicatus forte ab ordinario: accessit ad curiam domini papæ & obtinuit literas super sua absolutione: ordinarius, cui præsentatæ fuerunt, invenit in eis in constructione peccatum, dubitavit, utrum fides eis esset adhibenda? consuluit papam super hoc, & ille respondet, quod talibus litteris non est fides adhibenda. Panormitanus & glossa hanc rationem decidendi statuit, *quia rescriptum papæ transiit per multas manus*, item *cum magna maturitate decoquitur*, & non sit verosimile, tot officarios in cancellaria pontificis errorem incorrectum reliquisse. Extendit hanc adsertionem Panormitanus contra dissentientes ad eum quoque casum, *si rescriptum papæ non per cancellariam, sed per cameram*, ut loquitur, *emanaverit*, quia tunc oritur duplex præsumptio contra litteras. Primo, quod non emanaverunt per cancellariam secundum

dum communem stilum. Secundo, quod magis præsumitur falsitas, quando litteræ sunt quasi clandestinæ & continent peccatum in constructione. Nam decisio textus respectu nullitatis fundatur super præsumta falsitate. Item iste textus non fundatur super cancellaria, sed simpliciter loquitur & forte tempore hujus capituli non erat ita ordinata cancellaria, sicut hodie. Paulo post etiam addit Panormitanus, falsitatem citius præsumendam esse in litteris gratiæ, quam in litteris de iustitia.

§. XIV.

Adseritionem adductam tribus modis limitat Panormitanus. Ex prædictis, inquit, habes tres conclusiones. *Prima*, quod falsa latinitas vitiat rescriptum papæ, dummodo sit manifesta, *secus, si dubitabilis*. Ergo non vitatur rescriptum papæ, si stilus aliquo modo defendi & salvari potest, aut si saltem non satis proprie, latine, aut eleganter scriptum sit. Et de hoc casu accipiunt verba Gregorii ad Leandrum Episcopum Hispanensem in præfat. moralium in fin. quæ exhibentur in corpore juris canonici in decreto c. indignum 4. dist. 38. *indignum vehementer existimo, ut verba celestis oraculi restringam sub regulis Donati, conf. Strauch. amæn. jur. canon. eclog. 2. c. 13. Linckius ad tit. X. de rescript. §. 5. Stilus curiæ Romanæ etiam multa recepit, quæ minus elegantia, vel dubia esse videntur, Linck. loc. cit.*

§. XV.

Secunda Panormitani limitatio est, rescriptum papale non vitari propter vitium in constructione, si falsa latinitas potest salvari per figuram. Casus, quem

pro explanatione hujus adfert adfert Panormitanus, sequens est: dicebatur, inquit, in quodam rescripto apostolico, *quod rectores hospitalis & alie persone, quæ degere contingerint (contigerit) in eodem possent sepelire, &c.* quærebatur: utrum rescriptum vitietur propter illam falsam latinitatem? nam ubi dicit *quæ*, debet dicere *quas*, cum referatur ad illum infinitivum *degere*. Existimat, rescriptum salvari posse per figuram Sillespin. Nam illud verbum *quæ* potest esse neutrius generis & pluralis numeri & facere relationem ad verbum *persone* & ad verbum *rectores*, sic erit accusativi casus. Item, pergit, præsupposito, quod simpliciter adsumatur illud verbum *quæ*, ut faciat relationem ad verbum *persone*; tamen cum sit modicus defectus, non debet vitare litteras. Ita dictus auctor, qui etiam huc refert *c. n. X. de fid. instrum.* cujus verba hæc sunt: ex parte charissimæ in Christo filiæ B. quondam Anglorum Reginae fuit propositum coram nobis, quod cum nobilis Vir W. de Guerchia Nanneten. Redon. & Andeg. dioc. ipsam Castro de Segrejo ad eam ratione sui dotilitii pertinente pro suæ voluntatis arbitrio spoliavit, & ipsa super hoc contra eum a bonæ memoriæ I. Papa prædecessore nostro, ad nos litteras impetraret, quia pars adversa postulatis a nobis induciis deliberatoriis & obtentis, rescriptum apostolicum, *pro eo, quod in hac dictione*, spoliavit, *hæc figura O, deerat, adseruit vitiosum*; proponens nihilominus, quod mandatum hujusmodi exspiraverat, mortuo mandatore, licet jam a nobis tres citationes, vel quatuor emanassent: vos tamen admis-
pro-

procedere distulistis. Nos ergo de discretione vestra non modicum admirantes, cum per præcedentia etiam subsequencia intelligantur, *licet ex scriptoris vitio, vel occupatione prædictum O fuerit omissum*, satis vobis potuit de mandatoris intentione constare.

§. XVI.

Tertia Panormitani limitatio est, falsam latinitatem ex grammatica mala profluentem non vitiare rescriptum papæ, si illa surgit ex modico defectu litteræ, vel tituli. Hæc limitatio lucem capit ex modo adducto c. 17. X. de fid. instrum. unde plura ejus intuitu non addimus, hoc tamen obiter observamus, præsumptionem falsitatis jure canonico exinde quoque oriri, *quando præsentis litteræ papales contra stilum curiæ impingunt.* Casus huc pertinens habetur in c. 6. X. de crim. fals. Apostolica sedes hanc consuetudinem in suis litteris tenet, *ut patriarchas, archiepiscopos & episcopos fratres: ceteros autem reges, principes, vel alios cujuscunque ordinis filios adpellet.* Et cum uni tantum personæ litteræ diriguntur, *papa ei non loquitur in plurali, ut vos, sive vester, & his similia in ipsis litteris adponat.* Ergo si v. g. episcopus in litteris ipsi oblatis *filius* vocatur, falsitatem exinde adparere & hinc quemlibet litteras apostolicas *tam in bulla, stilo & charta, quam in stilo* intueri debere in d. c. 6. dicitur, v. Engel ad tit. X. de rescript. num. 14. Linck. ad eund. tit. §. 5.

§. XVII.

Interim, quæ hætenus ex jure canonico de præsumptione falsitatis ex artis grammaticæ regulis non observatis oriente adduximus: ea ambitiose tradita existi-

mat Scipio Gentilis *de error. testat. c. 4.* eo motus, quod pontificum scripta solæcismis & barbarismis pleraque scateant. Quid hic Gonzalez Tellez *ad c. 11. X. de rescript.* O impia, exclamat, Scipionis verba, qui ita audenter in sacras constitutiones irruis! etsi enim aliquando ex incuria typographi, aut bibliopolæ irrepsit vitium latinitalis, ideone arguendi & increpandi sunt religionis nostræ præfules summi, qui statuerunt, adeo vitium latinitalis alienum esse suis litteris, ut & eas vitiare decreverint. Sed non debuisset irasci Gonzalez Tellez Scipioni Gentili. Ubi rerum testimonia adfunt, non opus est verbis nec exclamationibus. Barbarismi apud pontificios nec olim fuerunt infrequentes, prout deinde pluribus videbimus, nec etiam hodie sunt. Ipse Panormitanus non diffitetur, (v. supra §. XIV.) quod rescripta papalia interdum non satis proprie, latine, aut eleganter concepta sint, & hinc præsumtionem falsitatis ex vitio contra grammaticam commisso orientem ad eum casum restringit, si vitium in constructione commissum, id est, si tale enorme vitium in rescripto reperitur, propter quod in schola pueri a ludimoderatoribus baculo, aut virga coerceri solent.

§. XIX.

Principum quoque rescripta ob vitium grammaticale vitiari existimat Gonzalez Tellez *d. l. num. 3.* citans Bartolum in *l. Plautius 8. num. 5. ff. de aur. & argent. legat.* Bartolus ipse non fuit ad manus, in repertorio tamen super ipsius prælectiones idem locus citatur & contrarium adseritur, *grammatica mala non vitiatur instrumentum, rescriptum principis.* Quidquid sit, si vitium enorme

me est illudque vel contra regulas grammaticæ communes, vel contra stilum curiæ impingit, v. §. XIV. exinde omnino aliquam suspicionem falsi oriri existimo. Secus in vitio leviore. Idem intuitu *sententiarum* obtinet. De levi vitio contra stilum curiæ admissio exemplum habet B. Sam. Strykius in *disp. de stilo curiæ c. 6. n. 10.* si in modo concipiendi sententias stilus communis est, ut in prima persona iudex nomen suum exprimat: **Wir Richter und Schöppen erkennen vor recht**, iudex autem alio modo pronunciet & in tertia persona nomen suum ponat: **Erkennen die Richter und Schöppen vor recht.** Aequale vitium est, si in fine sententiæ clausula illa receptissima a iudice omitteretur, **von Rechts wegen.**

§. XIX.

Ex sæpe dicta præsumptione falsi ex vitio grammaticali profluente hoc sequitur, non teneri iudicem statim rescriptum exequi, sed sine reprehensione eum secundam iussionem expectare posse. Si enim postea secunda iussio accesserit, constabit inde de enixa voluntate principis, ea enim tantum operatur, quantum motus proprius. Idem obtinet, si in rescripto vitium contra stilum curiæ deprehenditur, Everhard. *topic. legal. loc. a stilo curiæ 105. num. 1.* Gail. 1. *obs. 35. num. 6. seq.* Stryk. *cit. disp. c. 7. n. 9.* Optimum & tutissimum esse puto, ut iudex, vel is, quem causa tangit, rem statim ad principem referat, dubium suum intuitu præsumptionis falsi eidem exponat novumque iussum expectet. Nostri vocant: **man müsse noch einmahl anfragen.**

§. XX.

§. XX.

Hæc de *rescriptis*, *legibus* & *sententiis*. Singularia adhuc de *clericis* & præcipue de *episcopis* in-jure canonico occurrunt. Lingua latina, qua utebantur, sequioribus temporibus admodum corrupta erat, vel grammatica mala ubique regnabat. Testatur hoc inter alios Augustinus, qui seculo V. vixit, de *catechizandis rudibus* c. 9. qui locus in decreto quoque adducitur c. 12. *dist.* 38. Refert Augustinus, *venisse quosdam de scholis usitatissimis grammaticorum oratorumque* ea quidem intentione, ut christiani fierent. Risisse eos antistites & ministros ecclesiæ, qui in docendo (catechisationem vocant,) in regulas grammatices impingebant. Quid hic Augustinus? humilitatem suadet & contemptum illiteratorum dissuadet. Adponemus verba textus. Monendi, inquit, sunt scholastici, (id est, ii, qui de scholis usitatissimis grammaticorum venerant,) ut humilitate induti christiana discant non contemnere, quos cognoverint morum vitia, quam verborum amplius devitare, & cordi casto linguam exercitaram nec conferre audeant, quam etiam præferre consueverant. His etiam maxime utile est nosse, ita esse præponendas verbis sententias, ut præponitur animus corpori. Ex quo fit, ut ita malle debeant veriores, quam disertiores audire sermones; sicut malle debent prudentiores, quam formosiores habere amicos. Noverint etiam, non esse vocem ad aures Dei, nisi animi adfectum. Ita enim non irridebunt, si aliquos antistites & ministros ecclesiæ forte animadverterint, vel cum barbarismis & solæcismis Deum invocare, vel eadem verba, quæ pronunciant, non intelligere, perturbateque distin-

distinguere: non quia ista minime corrigenda sunt, ut populus ad id, quod plane intelligit, dicat Amen; sed quia pie toleranda sunt ab eis, qui didicerunt, ut sono in foro, sic voto in ecclesia benedici. Itaque forensis illa, nonnunquam forte *bona dictio*, nunquam tamen *benedictio* dici potest.

§. XXI.

De ejusmodi fratribus ignorantiae multa etiam apud alios inveniuntur. Ita Conringius *de antiquit. acad. suppl. 42.* (ubi de ultimis temporibus seculi noni loquitur,) *formulam inquisitionis*, quae extat sub initium operis Reginonis *de disciplina ecclesiastica*, adducit, *secundum quam episcopus inquirere debeat per vicos, pagos atque paræcias suae diœceseos.* Inter alia ibi circa presbyteros jubetur inquiri §. 83. *si epistolam & evangelium bene legere possit, atque saltem ad litteram ejus sensum manifestare* §. 85. *si sermonem Athanasii episcopi de fide S. Trinitatis, cujus initium est, quicumque vult salvus esse, memoriter teneat & sensum illius intelligat & verbis communibus enunciare* sciât. §. 88. *ordinem quoque reconciliandi atque ungendi infirmos, orationes quoque eidem necessitati competentes, si bene scit legere, aut memoriter enunciare.* Notat Baluzius, quendam Gislemarum regnante Carolo Calvo, cum electus esset in Remensem archiepiscopum, *oblatum textum evangeliorum aliquatenus quidem legere, nihil tamen ejus intelligere potuisse.* Refert porro Conringius ex Luitprandi *histor. l. 6. c. 10.* Iohannis XII. Papæ epistolam vitio malæ grammaticæ maxime laborantem. Iohannes episcopus servus servorum Dei omnibus episcopis, (in concilio tunc ab Ottone M. decimo seculo Romæ

congregatis) *Nos audivimus dicere, quod vos vultis alium papam facere. Si hæc facitis, excommunico vos de Deo omnipotente, ut non habeatis licentiam, ullum ordinare & missam celebrare.* Ad hæc tempora barbara referendi etiam sunt versus noti de M. Christophoro: *O magnum Christophorum &c.* & legenda de exorcista quodam prætenso, qui hoc modo exorcisabat dæmonem: *egredere male spirite*, cui dæmon exorcistam ridens respondebat: *nolvo*, &c. conferri hic etiam poterit Henr. Vagedes, Prof. Rintelenſis, in *oper. acad. diff. select. 2. de propagatione lingue Romanæ, profanæ, sacræque dominationis arcana*, ubi in specie §. IV. ostendit, priscum Germanorum sermonem horrido illo tempore, quò christiana religio in Germaniam introducebatur, adeo difficilem visum fuisse, ut illum nec scribi posse, nec litteris exprimi omnes judicarint. Exempla in hunc finem duo adducit de *symbolo apostolico & oratione dominica*. Nos saltem binas lineas adponemus. Art. i. symboli apostolici: *Rislaubu in Rot Fader Usmahiticun Riscas Himmels enti Erdu.* Initium orationis dominicæ: *Watter Unseer thu pist in Himile, wihe Namun dinan, &c.*

§. XXII.

Idem Vagedes in *decad. quest. philosoph. historiarum quest. 3.* ostendit, quænam sit origo hujus discriminis, quod alii orationem dominicam a *Water Unser*, alii ab *Unser Vater* exordiantur. Scilicet, rudioribus adhuc seculis apud Germanos oratio dominica e lingua latina in germanicam ita ad amussim transferebatur, ut ubi in latino vox *adjectiva* postponitur, idem tenor situsque in germanico retineretur. Ita: *Pater noster*

noster vertebatur: *Vater Unseer. Sanctificetur nomen tuum, wihi Namun dinan: adveniat regnum tuum, queme Rihe din: fiat voluntas tua, sicut in cælo, sic & in terra, werde wille din, so in Himile sosa in Erdu, &c.* Ex hoc etiam factum, ut apud omnes hæc oratio nomen *Badrunker* obtinuerit. In bibliis Wittenbergensibus aliisque, ad minimum recentioribus, grammatica bona reperitur, initium enim orationis dominicæ est: *Unser Vater.* Quid ad nos tempora horrida, quæ præterierunt?

§. XXIII.

Jam interum in viam. Augustinus supra §. XX. adductus hortabatur, ne *catechumeni* ministros ecclesiæ rideant, qui *cum barbarismis & solæcismis*, ut loquitur, *Deum invocant.* Sed hæc est admonitio saltem, non autem decisio intuitu quæstionum juridicarum. Idem sentiendum de admonitione *ad clericos directâ*, quæ habetur in *c. 10. dist. 37.* Si quis, inquit Hieronymus, *artem grammaticam, noverit, vel dialecticam, ut rationem recte loquendi habeat & inter falsa & vera judicet, non improbamus. Geometria quoque & arithmetica & musica habent in sua scientia veritatem: sed non est scientia illa scientia pietatis, &c.* Verum aliter sentiunt doctores, aliter vero judices, quando quæstio pro tribunali deciditur.

§. XXIV.

Juris expediti est, eum, qui officio aliquo fungi vult, omnibus illis qualitatibus præditum esse debere, sine quibus officio cum fructu præesse nequit. Alexander III. in *c. 4. X. de etat. & qualitat. & ordin. prefici-*

end. arctius inhibemus, ne personas, quæ in ecclesiis tui episcopatus ad curam animarum fuerint ordinande, in ipsis institutas, nec aliqua occasione, vel etiam litterarum nostrarum obtentu institui patiaris, quæ scientia, moribus & etate concilii non congruam instituis. Pertinet huc *c. 14. X. eod.* in specie autem quod in *c. f. eod.* habetur & quod nostræ intentioni maxime inservit: quamvis multa proposita fuerint contra episcopum Calinensem, quia tamen confessus est coram nobis, *se nunquam de grammatica didicisse, nec etiam legisse Donatum & per evidentiam facti usque adeo de illiteratura & insufficientia sua constat, quod contra Deum esset & canonicas sanctiones, tantum in episcopo tolerare defectum, ipsum a pontificalis officii executione & ab administratione Calinensis ecclesiæ penitus duximus amovendum.* Ergo, si quis illis qualitatibus præditus non est, sine quibus officio suo cum fructu præesse nequit, & nihilominus tamen ad illud officium admotus fuit: is ab officio iterum removeri debet. In sexta collectione hoc capitulum directum est ad capitulum *Bremenense*; verum Gonzalez Tellez *ad d. c.* ostendit, illud ad archiepiscopum Mediolanensem directum fuisse. Gregorius VII. quoque *l. 9. epist. 2. ad Alphonsum VI. Regem Hispaniæ* Sancium, Regis propinquum, licet aliis claris donis insignem ob grammaticæ defectum ab archiepiscopatu Toletano repulit, ut refert ex alio quodam Strauch. *amæn. jur. canon. eclog. 2. c. 13. in fin.*

§. XXV.

Non possum non, quin adhuc duo lepida exempla de incitiâ & extrema ignorantia clericorum hic subiungam. Clericus quidam iussus est, hæc verba abbreviata lege-

legere: Otto Dei grā (gratia) rogat vestram Cla, (clementiam) ut velitis hunc Clīc'm (clericum) conducere in Vfm Diač'm, (vestrum diaconum.) Legit vero ille:

Otto Dei gram, rogat vestram clam, ut velitis hunc clincuraclancum convertere in vivum diabolum.

Sic & cum olim nobilis adolescens sacris initiatus Bambergæ in collegium canonicorum adscisceretur, feria prima paschatos epistolam canere, & industriæ suæ specimen aliquod edere iussus est. Verum ille, qui non satis peritus erat linguæ latinæ, cum ad hæc usque verba progressus esset: *sicut & vos estis azymi*, 1 Cor. 5. v. 7. non-nihil hæsitans, tandem magna voce oculis in collegas defixis, decantare cœpit: *sicut & vos estis asini*. Canonici, qui assidebant, sibi fortasse male conscii in ruborem omnes dabantur. Tum vero prudentiores & doctiores: profecto, aiebant, id quod reip̃sa sumus, hæctenus nobis in faciem nemo hominum dicere ausus fuit. Hic adolescens verum dixit, verum cecinit, quem, iniquum fuerit, si æquis auribus & animis audire non velimus. Plura ejusdem farinae etiam de ipsis pontificibus refert Finckelth. *de jur. patron. c. 6. num. 67.*

§. XXVI.

Plurimos textus juris canonici adsertionem in §. XXIV. de removendis ab officio clericis illiteratis confirmantes conglomeravit Gonzalez Tellez *in comm. ad d. c. f. X. de etat. & qualis. & ord. præfic.* Subjungit quoque idem autor rationes dubitandi & decidendi. Rationes dubitandi præcipuæ hæc sunt, *quod in prælatis ecclesiasticis potius charitas, quam scientia adtendi debeat, quia illa ædifi-*

cat, hæc autem inflat: *quia episcopi non egent ea litteratura, ut evangelia populis exponant, c. 12. dist. 38.* quo pertinet in specie *c. 5. dist. 86.* ubi Gregorius Desiderio episcopo: post hoc pervenit ad nos, (quod sine verecundia memorare non possumus,) *fraternitatem tuam grammaticam quibusdam exponere, quod Gregorius improbat ex eo fundamento juxta regulam graminaticæ suæ, bonæ, an malæ? quia in uno se ore cum laudibus Jovis Christi laudes non capiunt.* Adhuc aliam rationem dubitandi subjungit noster auctor, *quia si deicerentur, (ab officio) maxime ob defectum scientiæ, sunt irregulares, & hinc promoveri ad ordines, aut ad beneficia eligi non possunt: sed illiterati ob defectum scientiæ nullam contrahunt irregularitatem, in quem finem citat Marquinum, Hugolinum, Majolum, Gibalinum, ceteros, igitur, concludit, semel promoti deici non debent. Accedere, dicit, sacros canones circa illiteratos promotos statuere, ut a superioribus erudiantur & doceantur, non tamen, ut deiciantur, seu deponantur, v. concil. Toletan. §. can. 8.*

§. XXVII.

Rationem decidendi eandem habet, quam nos supra §. XXIV. adduximus, quia committere munus homini, qui peritia ad illud obeundum necessaria destituitur, perinde est, ac velle munus inutiliter, vel etiam cum damno exequi, ut argumento ducto a nauclero, seu navis duce, probat Prosper. *l. 1. de vit. contemplat. c. 16.* Immo, nec ipsum pontificem de prorsus illiterato ad beneficium admittendo dispensare posse existimat, quia si cæcus cæcum ducit, ambo in foveam cadunt, *can. 5. dist. 38.* Prout vero sunt distincti gradus in ministris ecclesiasticis: ita
non

non una mensura scientiæ in omnibus desideratur. Sufficiens ergo est scientia, quæ sufficit iis explendis, quæ necessario incumbunt cujusque officio & ministerio.

§. XXIIIX.

Ad rationes dubitandi ita respondet num. 6. verum quidem esse, quod charitas sit adtendenda in prælatis ecclesiasticis, non tamen ideo negligendam esse litterarum scientiam, licet enim aliqua possit supplere charitas, non tamen omnia, quæ scientia præstat. Unde modica scientia juncta cum magna charitate præstat rectum prælatum, non autem charitas sola, c. 1. X. de renunciat. In c. si quis 10. dist. 37. non damnari artem grammaticam, sed potius dici: si quis artem grammaticam noverit, vel dialecticam, ut rationem recte loquendi habeat, & inter falsa & vera judicet, non improbamus. In can. 5. dist. 86. Desiderium episcopum ideo reprehendi, quia cum deberet populo sacram scripturam exponere, tantum grammaticam exponebat, addictus mere illius locutioni, & non sensibus sacræ scripturæ in c. 8. dist. 37. & alibi etiam lectionem scriptorum profanorum permitti, ergo, ne maneat antinomia, adserendum esse, prælatis & personis ecclesiasticis gentilium liberis uti licere, ut, quæ utilia ab ipsis inventa sunt, expositioni sacræ scripturæ deserviant; quæ autem aut tærpia, aut obscœna dicta sunt, rejiciant refellantque. Legimus enim aliqua, ne negligantur; legimus, non ut teneamus, sed ut repudiemus, & sic dum temperata eorum librorum lectione utimur, sacris canonibus non damnamur, v. Duarenus de sacr. eccles. ministr. l. 4. c. 2. Circa inscitiam litterarum in præsentī materia intuitu irregularitatis distinguendum esse.

esse. Illam ignorantiam, quæ omnino impedit exercitium ordinis, impedire ordinandos & irregularitatem inducere, ut si is, qui in lectorem, aut diaconum ordinandus est, nesciat legere: qui in exorcistam, exorcismos recitare nequeat. Eam vero ignorantiam non inducere irregularitatem, quæ tantum impedit, ne recte obeantur munera sacra adposita scientia, quam sacri canones præscribunt, & de hoc casu accipi debere *d. c. fin. c. penult. X. de art. c. qual. c. ord. de priori autem can. 1. dist. 36. & c. fin. de temp. ordin. in 6.*

§. XXIX.

Apud nos eodem modo serres habet, quod nempe verbi divini ministri illis artibus instructi esse debeant, sine quibus officio suo præesse nequeunt, & quod ignari & illitterati de facto ad officium aliquod promoti iterum removendi sint. *Magdeb. Kirchen-Ordn. c. 14. §. 3. ibi: zu Ersezung der erledigten Pfarre einen gottesfürchtigen und gelehrten Mann der eingepfarreten Gemeinde und dem Landes-Fürsten, als episcopo, oder dessen Regierung und Consistorio zu præsentiren. Braunsch. Kirch. Ordn. c. 2. §. 2. ibi: so soll solchem Candidato eine gewisse Zeit zu Einbringung glaubwürdiger Zeugnisse von seinem Herkommen, erudition, Leben und Wandel angesetzt werden, conf. pluribus Finkelth. de jur. patron. c. 6. num. 67. & de usu veræ grammaticæ in articulo de justificatione v. Chemnit. in loc. theolog. loc. de justificat. c. 3.*

§. XXX.

Prodeat adhuc aliud exemplum malæ grammaticæ & simul novum specimen ignorantix clericorum barba-

barorum cum adplicatione juridica. Zacharias Papa Bonifacio, apud Germanos legato, rescribit: retulerunt nuntii tui, quod fuerit in eadem provincia sacerdos, qui latinam linguam penitus ignorabat, & dum baptizaret, nesciens latini eloquii, infringens linguam, diceret: *baptizo te in nomine patris, & filii & spiritus sancti.* Quærebatur: *utrum hoc modo baptizatus iterum rebaptizari debeat?* Bonifacius (qui tamen ejusdem generis grammatica alias fere utebatur, v. Conring. *de antiquit. acad. supplem.* 35. §. *& vero etiam p. m. 306. ab init.*) illum rebaptizare volebat, sed Zacharias contrarium rescribit. Ita enim ille porro: *sed sanctissime frater, si ille, qui baptizavit, non errorem introducens, aut hæresin, sed pro sola ignorantia Romanæ locutionis infringendo linguam, ut supra sati sumus, baptizans dixisset, non possumus consentire, ut denuo baptizetur.* Franciscus Sylvius in *addit. ad Caranzæ summam conciliorum post concil. Toletan. 13. p. m. 509.* sequentia adhuc addit: *quia quicumque baptizatus fuerit ab hæreticis in nomine patris & filii & spiritus sancti, (ut tua fraternitas bene compertum habet,) nullo modo rebaptizari debet, sed per solam manus impositionem purgari.* Vale frater.

§. XXXI.

Subsistebat ergo baptismus, quia forma essentialis ejusdem aderat, scilicet *actus lotionis* & ex intentione baptizantis *invocatio SS. Trinitatis*, illa intentio enim hic eodem modo reperitur, ut in illis intuitu laudis divinæ, de quibus supra §. XX. dicebatur, quod cum barbarismis & solæcismis Deum laudaverint. Consentiant nostrates, v. Ioach. Hildebrandi *ritual. baptismi veteris p. m. 42. id. a. 1699.* Kōnig. *de cas. consc. cas. 4. p. 245.* quem citat &

E

sequi-

sequitur Hornius, Jct. Wittebergenfis, *in addit. ad Schilter. instit. jur. canon. l. 2. tit. 2. §. 16.* adde ipsum Schilterum *in d. instit. l. 2. tit. 2. §. 13. & 16.* & illustrationis gratia, quæ mox sequentur.

§. XXXII.

Quæritur enim: *quare frater ille ignorantia non fuerit remotus ab officio?* quod supra §. XXIV. in simili casu factum fuisse vidimus. Responderi potest, in adducto textu non tractari quæstionem, an presbyter illitteratus ab officio removeri debeat, sed solummodo, utrum baptismus ab eo conlatus sit iterandus. Deinde, addit Gonzalez, incitiam presbyterorum in Germania tolerabatur propter nimiam incitiam & litterarum ignorantiam, quæ in illis partibus (seculo II X.) invaluerat. Unde cum evangelium noviter prædicaretur a S. Bonifacio in ea provincia litteris inculta, ideo non dejicitur presbyter ignarus, ut docet Petrus Gregorius *in c. ad audientiam. de rescript. num. 6.* Adde ex Francisco Sylvio §. XXX. supra citato, *p. 504.* quod Zacharias Papa fuerit vir mitissimus & suavis, amator cleri & totius populi Romani, tardus ad irascendum & velox ad miserendum.

§. XXXIII.

Transimus nunc ad materiam *contractuum & testamentorum.* In *l. 8. ff. de stat. hom.* Papinianus dicit, imperatorem Titum (vel rectius: Divum, juxta Mor-nacium) Antoninum rescripisse, *non ladi statum libero-rum ob tenorem instrumenti male concepti.* Hac occasione Bartolus *ad d. l.* quæstionem format: *an propter malam grammaticam vitietur instrumentum?* Glossa hunc casum pro-

proponit: scribi debebat *Lucius liber*, sed scribens deliquit in grammatica & scripsit *Lucius servus*. Vel dixit quis *Titius*, cum *Lucius* dicere debuit. Hoc non præjudicat veritati. Idem est, si vitium contra regulas artis in constructione commissum, glossa & Bartolus *loc. cit.* Extendunt adsertionem ad eum quoque casum, si notarius instrumentum confecit & juxta regulas non est locutus.

§. XXXIV.

Nobis circa hanc quæstionem distincte procedendum esse videtur. Si adversa pars rem ita se habere, prout in instrumento scriptum est, negare non potest, sed solummodo sub hoc prætextu litem protrahere vult, quod instrumentum vitio malæ grammaticæ laboret: res evidens est, quod, stilo Bartoli, instrumentum propter malam grammaticam non vitietur. Sed quid, *si adversa pars instrumento propter dictum vitium exceptionem falsi instrumenti opponat?* subdistinguendum esse censeo. Aut adversa pars *ad juratam diffensionem sese offert*, aut *non offert*. Posteriori casu procedunt ea, quæ in §. præc. ex glossa & Bartolo adduximus, propter malam grammaticam non vitiari instrumentum. Nam non solum in pagis, sed non raro etiam in urbibus multi homines reperiuntur, qui ne quidem grammatisticen intelligunt & nihilominus tamen vel proprio, vel aliorum nomine formulas contractuum conscribere audent, quo etiam nonnullos sicdictos ludimoderatores referre potes, qui pueros primas litteras docere volunt, v. supra §. I. interim si res vere ita gesta, prout barbare, licet in scripturam redacta: imputet sibi ille, qui instrumentum ab ejusmodi

homine imperito confici curavit. Nec mala grammatica obest veritati. Casu *priori*, si pars adversa, instrumentum prætenfum mediante jurejurando diffictetur: nihil illud probat, quod etiam tunc obtinet, si omnia juxta regulas artis adcuratissime scripta. Permissum tamen in processu ordinario est illi, qui ejusmodi instrumentum producit, ut, si adversam partem ad juratam diffessionem admittere non vult, per testes contrarium probet, de qua materia v. Berlich. *p. 1. concl. 44. n. 48. seq.* Carpzov. *proc. tit. 14. art. 3. n. 67. seqq.* Stryk. *introd. ad prax. c. 19. §. 10.*

§. XXXV.

Tangenda hic quoque est illa quæstio: *quodnam scilicet instrumentum alteri præferendum, si duo contraria inveniuntur, quorum alterum juxta regulas artis conscriptum, alterum vero barbarismis & solæcismis scatet?* exponemus responsionem verbis Antonii Fabri in *Cod. l. 4. tit. 16. def. 3.* sed si hac parte contrariæ sint scripturæ, aut una plenior altera, ei omnimodo stabimus, quæ minus suspecta est, ab eo nimirum confecta, cujus nihil intersit. Longe siquidem dignior est, cui credatur, is, quam cujus interest. Itemque *ceteris paribus is, qui latine loquitur, quam qui barbare, aut qui solæcisat*, conf. Joh. Petr. de Ferrariis in *pract. sub rubr. forma opponendi contra instrumentum verb. tum quia in eo adparet erratum in dictis & grammatica.* Quod dicit Antonius Faber: *ceteris paribus*; hoc ita intelligendum, si uterque scribens est integræ vitæ & fidei. Si ergo is, qui latine scribit, est homo sublextæ, is vero, qui barbare, aut qui solæcisat, bonæ fidei: huic certe major, quam illi, fides adhibebitur.

bitur. Sed dicebatur tamen in §. XXXIII. propter malam grammaticam juxta glossam & Bartolum non vitari instrumentum; respondemus hanc adsertionem limitatam fuisse §. XXXIV. deinde hic est casus specialis, quia super eodem negotio duo diversa instrumenta confecta sunt, quorum unum vitio malæ grammaticæ laborat. Et puto hoc casu adversam partem, quæ fundamentum intentionis ex instrumento vitioso desumere vult, ad diffensionem alterius instrumenti, quod latine, vel juxta regulas artis conceptum, non esse admittendam, præsumtio falsi enim contra eam militat.

§. XXXVI.

Pergimus ad *testamenta*. Hic DD. iterum statuunt, testamentum non vitari ex defectu unius litteræ, vel syllabæ, modo alias de mente testatoris constet, Gonzalez. *ad c. ii. X. de fid. instrum. n. 2. verb. non obstante*. Casus hanc materiam illustrans habetur in *l. 7. C. de testam.* Scripserat testator: *Lucius esto*, sed omiserat vocabulum *heres*. Vel ex diverso, scripserat: *Lucius heres*, sed omiserat verbum *esto*, quærebatur: an testamentum nihilominus subsistat & quoad heredis institutionem & per consequens quoad legatorum præstationem? decidunt Impp. Diocletianus & Maximianus, illud omnino subsistere. Verba legis hæc sunt: *errore scribentis testamentum juris solemnitas mutilari neutiquam potest, quando minus scriptum, plus nuncupatum videtur: & ideo recte testamento con-*

§. XXXVII.

Idem casus & eadem decisio reperitur in *l. 1. §. 5. 6. 7. ff. de hered. instit.* ubi ita Ulpianus: *si autem sic scribat, Lucius heres, licet non adjecerit esto, credimus plus nuncupatum, minus scriptum: & si ita, Lucius esto, tantundem dicimus: ergo & si ita, Lucius solummodo. Marcellus non insubtiliter, non putat, hodie hoc procedere. Divus autem Pius, cum quidam portiones inter heredes distribuisset ita, ille ex parte tota, ille ex tota, nec adjecisset, heres esto, rescripsit, valere institutionem: quod & Julianus scripsit. Idem divus Pius rescripsit, illa uxor mea esto, institutionem valere, licet deesset heres. Idem Iulianum, illum heredem esse, non putavit valere, quoniam deest aliquid: sed & ipsa valebit, subaudito, jubeo. Aliud, si scripserit testator: heres esto, & nomen heredis omiserit, *l. 4. ff. de reb. dub.**

§. XXXIIX.

Supponitur quidem, præcipue in *cit. l. 7. C. de testam.* quod non ipse testator, sed alius ejus nomine testamentum scripserit: verum enimvero idem statuendum esse existimo & in eo casu, licet ipse testator testamentum in scripturam redegerit, aliquid vero omiserit, quod tamen ad plenum & perfectum sensum heredis institutionis necessarium erat. Scilicet DD. hanc rationem decisionis adferunt: sufficere, modo certum sit, de quo senserit testator: subjectam materiam hoc indicare: ex antecedentibus & subsequentibus adparere, voluisse testatorem eis verbis heredem instituere & ergo, quia hoc adparet, ex una, vel altera voce, licet sermo sit ellipticus, heredis institutionem colligere licere, Brun-
nem.

nem. *ad d. l. 7. de testam.* At vero hæc ratio ad alterum quoque casum eodem modo applicari potest, si testator ipse testamentum conscripsit. Consentit Perez *ad C. d. tit. num. 3. in f. ibi: sive alius scripserit testamentum, sive testator ipse, cum festinando non sit mirum, omitti aliquid.*

§. XXXIX.

Alius casus habetur in *l. 54. ff. de manumiss. testam.* Habebat aliquis servum *Cratistum*, sed scribens testamentum ita cavit; servus meus *Cratinus* liber esto, quærebat: an servus *Cratistus* ad libertatem pervenire possit? cum testator servum *Cratinum* non habebat, sed hunc solum *Cratistum*. Deciditur a Scævola, *nihil obesse, quod (testator) in syllaba errasset.* Ratio in §. præc. adducta hic iterum applicari potest. Vincentius Fusarius in materia de fideicommissis *rr. de substit. fideic. qu. 285.* præsentem nostram materiam quoque tangit, ita enim format dictam quæstionem: *falsa grammatica, vel latinitas, an noceat in fideicommissis?* Subjungit hanc brevem responsionem: non nocere scribunt in specie Alciat. in *l. si quis in fundi vocabulo 4. n. 3. ff. de legat. 1.* Paris. *l. 3. conf. 69. n. 8.* Peregr. *l. 5. conf. 65. num. 3.* Mantica *de conject. ult. volunt. l. 8. tit. 1. num. 22.* Gallus *de except. success. tit. 4. except. 23. n. 53. part. 2.* quæ repetit B. Strykius in *tract. de caut. testam. c. 17. membr. 1. §. 34.* & simul hunc casum subjungit: Scripserat aliquis: *Mein Sohn Pamphilus soll haben 1000. Rthlr.* titulo jureque *restitutionis*, ubi scribere debuerat *instituti nis.* Sustinebatur testamentum ex ratio-

§. XL.

Mala grammatica ergo non vitiat testamentarias dispositiones. Illud interim certum est, quin eo casu, si dubium est, *de qua re testator locutus sit*, in materia de interpretatione ille significatus præferendus sit, qui cum regulis artis grammaticæ congruit. Pertinet huc casus, qui habetur in *l. Plautius 8. ff. de aur. argent. mund.* mulier quædam ita legaverat: quisquis mihi heres erit, Titia *vestem meam*, mundum, ornamentaque *muliebria* damnas esto dare; quærebatur: *an omnis vestis, an vero muliebris solum legata sit?* deciditur, omnem vestem legatam esse, ita enim verba legis sonant: Cassius ait, si non adpareret, quid sensisset, (id est, si non adsint aliæ probationes, quod testatrix solam vestem muliebrem legare voluerit) omnem vestem secundum verba testamenti legatam videri. Paulus: (qui est auctor hujus legis,) idem Javolenus scribit, quia verisimile est, inquit, testatricem tantum ornamentorum universitati (per vocem *muliebria*) derogasse, quibus significationem muliebrium adcommodasset; accedere eo, quod illa demonstratio, *muliebria*, neque vesti, neque mundo *adplicari salva ratione recti sermonis potest*, conf. Dion. Gothofred. in not. ad *l. 4. C. de recept. arbitr. lit. s.*

§. XLI.

Sed quid, si testator ipsa vocabula mutet ipsisque alium significatum imponat? textus huc pertinentes sunt in *l. 4. pr. ff. de legat. 1.* & in *l. 7. §. 2. ff. de supellect. legat.* In *cit. l. 4. pr.* Ulpianus recte distinguit inter nomina propria & adpellativa. Non nocere dicit, si quis in nomine proprio

prio erravit, v. g. *si fundum Cornelianum pro Semproniano nominavit*, deberi enim nihilominus Sempronianum; secus autem se habere, si quis in corpore, vel nomine adpellativo erraverit, v. g. *si cum vellet vestem legare, suppellectilem adscripsit, dum putat, suppellectilis adpellatione vestem contineri*: Pomponius scripsit, vestem non deberi, quemadmodum *si quis putet, auri adpellatione electrum, vel aurichalcum contineri, vel quod est stultius, vestis adpellatione etiam argentum contineri*. Rationem addit, quia rerum vocabula immutabilia sunt: hominum mutabilia, sive, vt in *cit. l. 7. §. 2. ff. de suppellect. leg.* intuitu nominum adpellativorum dicitur, quia non ex opinionibus singulorum, sed ex communi usu nomina exaudiri debent, v. quæ diximus supra §. IX. Scilicet nomina adpellativa ex communi usu loquendi & tacita conventionne populi alicujus rem certam designant, v. g. equus, & ergo, si illa vocabula quilibet pro lubitu mutare posset, v. g. ut adpellatione equi canem intelligeret, multæ deceptiones, fraudes & elusiones exinde propullularent. At vero nomina propria ab arbitrio cujuslibet privati dependent atque hinc ex eo capite nemo læditur, licet in nomine erraverit, v. g. si putaverit, servum vocari Titium, qui Mevius audit. Nomina enim propria non habent connexionem cum re ipsa, unde quis Davi nomen habere potest, qui tamen Oedipus est, & versa vice. Ergo etiam nomina propria mutabilia sunt, nisi quis nomen cum in finem mutet, ut alterum hoc si

§. XLII.

Id quoque certum est, si quis ita male scribat, aut ita barbare loquatur, ut neque scriptura legi, neque ex verbis sensus loquentis ulla ratione erui possit, quod tunc ipsa dispositio vitietur. Non esse enim & non adparere paria sunt. Per jocum quidem dici solet: *nos docti male scribimus*; sed hoc non producit effectum in jure, verum ex diverso dicitur: *qui non vult intelligi, debet negligi*. Possset hic certa ratione adplicari, quod habetur in *l. 27. ff. de reb. dub. si quis de pluribus unum manumitti voluerit, nec adpareat, de quo manumittendo testator sensit: nulli eorum fideicommissaria competit libertas.*

T A N T U M.

CLARISSIMO DN. LEYSSNERO

S. P. D.

JAC. FRID. LUDOVICI.

Aliquot anni jamdum sunt elapsi, ubi in illustri nostra Fridericiana in numerum studiosorum receptus es & primum gradum ad studium jurisprudentiæ fecisti. Alterum deinde Lipsiæ, & tertium gradum iterum in Fridericiana academia fecisti. Absolutis collegiis lectoriis gradum fecisti ad examinatória & præcipue mihi præterito semestri æstivo eruditionem & diligentiam Tuam abunde probasti. Jam gradum facis ad specimen & examen publicum, unde non possum

possum non, quin ad Te hac occasione adplicem verba
Ciceronis: quotiescunque gradum facis, toties Tibi tua-
rum virtutum venit in mentem. De Grammatica ma-
la disputas & de bona sollicituses, quia malam improbas,
ergo novum gradum facis. De grammatica grammati-
ce considerata recte dicit Quintilianus: minus esse feren-
dos eos, qui hanc artem ut tenuem ac jejunam cavil-
lantur, nisi enim illa oratori futuro fundamenta fideli-
ter jecerit, quicquid superstruxeris, corruiere: necessa-
riam esse pueris, jucundam senibus, dulcem secretorum
comitem. Ergo nec illi sunt ferendi, qui hanc artem
juridice consideratam forte ut tenuem ac jejunam cavil-
lantur. Ego, clarissime DN. LEYSSNERE, Tibi de
gradibus hætenus feliciter factis & de præsentis specimi-
ne ex animo gratulor, simulque exopto, ut brevi tem-
pore ad altiora progrediaris & graduum Tuorum uber-
rimos fructus conligas. Vale. Dabam d. XXIV,
Octobr. MDCCXX.

ARtibus ingenuis semper, LEYSSNERE, vacasti,
et volupe studiis invigilasse fuit;
GRAMMATICAM inde MALAM Tua dissertatio tractat,
Ac Instrumentum quid vitiare queat.
Gratulor ergo TIBI! Numen Tua facta secundet!
Atque Tuos tangant nulla pericla Lares!

*Nobilissimo atque Doctissimo LEYSSNERO,
Dissertationis Auctori politissimo paucis hi-*

Dies ist ein holder Tag, er ist nicht ohne Freuden,
Indem mein werther Freund heut aufs Cathe-
der steigt.

Er darff vom Momo nicht deswegen Tadel leyden;
Weil sein Zweck selbst ist, daß Er die Fehler zeigt.
Drum gratulir' ich Ihm zu diesem Unterfangen;
Sind gleich die Worte schlecht, und schlecht dis mein
Gedicht:

So wird Er doch gewiß nicht schlechten Ruhm erlangen.
Und das sagt noch zuletzt ein Freund, der heuchelt nicht.

CARL FRIEDERICH von SCHEELLEN,
gente Rügdanus.

Impune nemo Prisciano vellicat
Barbam verendani. Vindicant injuriam
Non Orbilii tantum feroces affeclæ
Sed & politi Themidos almæ filii.
Hos inter arma stringis atque classico
LEYSSNERE pugnae signa das DOCTISSIME
Victoriam vis pollicetur ingeni
Felicis, edepol! acuti, fervidi.
Ergo futuri certior solemniter
Jo, triumphes! Jo triumphes! præcino.

*Sic Prænobilissimo DN. LEYSSNERO,
eruditionis specimen edituro applaudit*

P. L. HUTH, LL. C.



A411472274